

國立嘉義高級中學客家語朗讀文章(海陸腔)

編號 1 號

【旅行】林貴珠原作

這下個時代逐個人定著有旅行個經驗，對有兜人來講，旅行係放鬆心情，也有人認為旅行係閃避壓力，對佢來講旅行係人生最有價值個投資。佢想去看佢落泥以外個世界，人無旅行過，毋知世界有幾大，無冒過險，不知好珍惜生命。旅行摺人生共樣，你會緊堵著生份人，對生份到熟事，再過對熟事轉到生份。你行到外國，摺無共樣國家個人接觸後，你會發現：原來佢俚生活個空間恁細，有恁多毋識聽過、毋識看過個人摺東西，原來人生做得恁樣過！佢想滿哪仔去旅行增廣見聞，寫出無共樣個人生劇本。

佢最想去爬一座高山，就摺老公參詳，決定在日本換新年號時節去蹶 3776 公尺个高山。打早 6 點全世界想愛熟事佢个人，在山神廟前祈求一路平安，順續做登山个準備，有人買食个、有人翕相个鬧熱煎煎。涼涼个山風噉等逐儕个面頰卵，歡迎大家來遶寮，踏等快樂个腳步來到半山排，看著佢脫忒青溜溜个衫褲，換著豬肝色个火山石禮服。下晝四點佢兜爬到 3200 公尺，在翕熱个七月，山頂斯伸著零下 2 度，大家就落到山屋休息，到半夜 11 點

半再過出發爬最尾一段山路，在星仔摺月光做伴下踏出成功个腳步，佢牽你、你拉佢互相扶持，蹶上日本最高个位所時節，早斯汗流脈絡咧。上山个路彎彎幹幹，像人一條金那那个龍，纏等山崗鑽落雲海裡肚。臨天光山風颼颼滾¹，大家齧等牙根摺冷風拚輸贏，等到日頭洒出雲海，黏時射出晟眼个日頭絲，箭到人目珠強強擘毋開。佢著等紅啾啾个禮服摺大家攞手講恁早，大家感動到目汁摺汗水斯分毋清，這係佢這一生人看著最闊、最遠、最錫人个景緻，迂一輪火山口過後就下山，完成這擺艱難个挑戰。

旅行个重點毋係去幾多地方，看過幾多錫人个風景，係旅行轉來過後，自家改變了麼个，有兜个風景，你係無企在高處來看，毋知佢幾錫人；有兜个路無去行過，定著無法度感受有幾靚。每一擺旅行都有佢个意義，對佢來講透過旅行做得尋著真實个自家，旅行也分佢个生活改變盡多，無論係對旅行个看法，抑係對人生个態度，旅行係一種拂毋忒个甜蜜回憶，盡錫人尋味。

¹ 颼颼滾：音 siu siu gun'；風吹過聲音。

【搞頭王】曾秋梅原作

放寮日，臨天光斯會分大人喊蹴床，去田町搦手割田塍草、掌牛，無人敢在眠床搵等。無細人仔搞个禾埕，恬靜到連狗都懶蛻蛻仔，搵在花樹頭下啄咕¹。毋過當晝一過，歸禾埕都係細人仔在該搞，噉噉嘶嘶²，吵到屋頂都會掀忒。

伙房个阿正牯係有名个搞頭王，當晝頭老人家愛睡目，佢斯偏偏愛撈一大陣半大細个伴在禾埕搞球仔，擲過來、擲過去搞到當快樂。球仔係無生目珠輪³到叔婆屋下去，該就艱苦哩啲！叔婆非常惡，阿正牯天毋驚地不怕，斯驚叔婆，佢躡腳尾⁴落去尋球仔，無想著球仔分叔婆拗等，齧牙齧齒⁵大聲罵：「你這兜犂囉仔攏死人，想愛睡一下當晝斯做毋得，佢撈球仔破破⁶忒佢，看你兜愛搞麼个。」阿正牯嚇到面壠青，煞煞瀉等出，企在屋簷下，嘴町噉噉噉又緊蹬腳。

¹ 啄咕：音 dug gu；打瞌睡時頻頻點頭貌。

² 噉噉嘶嘶：音 ve ve se` se`；大聲喊叫。

³ 輪：音 lin`；滾動。

⁴ 躡腳尾：音 nen` giog mui`；提起腳跟。

⁵ 齧牙齧齒：音 ngad nga sen` chi`；咬牙切齒。

⁶ 破：音 po`；剖開。

臨暗仔阿正牯又在禾埕搞園人尋。伙房屋像老鼠空，偃兜細人仔舂上舂下，驚分人尋著，連屎缸斯走落去園。阿正牯膽當大，跳到豬欄裡背園，無細義噉蹯著豬子，豬子痛到噉噉滾，阿正牯嚇到飆等出來，好死毋死噉徑著豬籠橫著，額頭撞著牆頭起一隻瘡，分厥爸打到喊毋敢。

熱天个時節，莊下个細人仔當好去河壩搞水，搞啊搞仔，毋使花錢就學會泅水仔咧。西北橋下个河壩水係三冷水，三冷水會合个地方就會形成扭皺窟⁷，頂高看啊下當得人驚。

有一日，阿正牯又弛崗打牌去河壩洗身仔，該下，在河壩搞水通棚都係脫光光在河壩跳上跌落，無麼个好見笑个。大家搞到當興頭个時節，阿正牯對橋頂出力一跳，唉哉！「四溝水⁸人蹬牛屎——的準⁹」，噉跳落扭皺窟肚毋見忒咧！共陣个人驚到大嫌牯聲喊：「救命哦！有人分水浸著咧！」阿正牯命當大，該量時堵好有一個在河壩舂掌牛个後生仔，佢聽啊著牛索一放，遽遽跳落水寶肚，撈沉到扭皺窟个阿正牯救起來。

人講：「大難不死，必有後福」，搞頭王阿正牯出社會以後，正式在臺北做頭路賺盡多錢，對莊肚个修橋鋪路出錢當大概。還較重要个係對救命个恩人，過年過節一定大擺細擺去佢屋下答謝，無一年跌忒過。

⁷ 扭皺窟：音 ngiu` ziu` fud；漩渦。

⁸ 四溝水：音 si` gieu` shui`；屏東萬巒地名。

⁹ 的準：音 dag zhun`；非常準確、精準。

【毛蟹】邱一帆原作

日頭下，圳溝肚，脣頭个石縫仔，伸出毛蟹个兩支大夾，大夾面頂絨絨个毛，分流水梳到一條一條，對清清个圳水面頂看下去，仰般條理清楚。阿明輕手輕腳打水尾，一步一步行兼該石頭縫，黏皮手一抓，恁堵好！手指嗰分毛蟹夾著，目珠窟一下灌入大水，痛到緊喊阿姆哀！

毋盼得放過毛蟹，阿明盡命拈愛摺毛蟹拉出來，毛蟹乜死命拈退落深深个空肚去，阿明个手毋知仰般嗰分空肚石縫卡著，無法度再過伸落去，乜無法度摺毛蟹拉出來，出入就毋得。仰結煞？阿明用盡歸身个力，尿就險險洩出來，正摺該支左手擲出來！該載正得，手伸得出來，毋過，手指嗰夾著一支毛蟹夾——毋著！係分毛蟹夾夾著，毋得敝正著，這擺該死咧！

夾到纏纏个毛蟹夾，害阿明痛到會死，佢目汁含等，遽遽用正手兩指，強強摺夾仔掙¹下來，手指面兩點分毛蟹夾著个痕，清清楚楚、積血積血！阿明心肝肚想：「捉毋著毛蟹，毛蟹夾乜毋好打爽！連蝦公共下帶轉去炒，摺肉挖來食，再過摺佢个毛刮

忒、串肥料線，拿來做夾仔搞，分人經驗一下分毛蟹夾著个痛……」。

阿明當記得，三十零年前還讀國小時節，分毛蟹夾著个這隻故事！三十年前，小南埔莊外个大河壩、外崗圳、中央圳、莊項个圳溝、脣頭个坑壩，阿明對水頭到水尾哪位就有行過，哪位就有搞過。佢長下看著毛蟹、釣著毛蟹、食著毛蟹。阿明當記得，有一擺落大水、出汶水，佢在坑壩釣毛蟹，毛蟹一擺就兩隻、兩隻分佢釣起來，無一點鐘，就張淦歸錫桶，佢歡歡喜喜擺轉屋家，分阿姆做料理。又有一擺做大水个臨暗仔，阿明看著歸群歸群个毛蟹，蹶上石礮，跔等山溝、山壩行等上……。

三十年前，哪位就有、麼人就做得捉、麼人就食得著，該河壩、坑壩、圳溝肚个毛蟹，走到哪位去咧？三十年後，政府大量對中國進口，廢田地、挖魚塘來畜个毛蟹，講啊著一隻就愛幾下百銀來買，麼人買得起、麼人食得起？阿明實在恹毋解。

¹ 掙：音 dui'；扯。